

- \*1. جموں کشمیر اسمبلی انتخابات واسطے ووٹاں غی گنتی جاری ہے تے این سی واحد سب تیں بڑی پارٹی بن غے اُبھری ہے تے بی جے پی نے جموں خطہ مانہہ جیت حاصل کی ہے۔
- \*2. شگون پریہار نے نیشنل کانفرنس غا سجاد کچلو تے عام آدمی پارٹی غا محراج ملک نے سابق وزیر نانہہ شکست دتی ہے۔
- \*3. کانگریس تے این سی غا درجنان لیڈران غی شکست توں اُن غو سیا سی مستقبل داؤ ور لگ گیو ہے۔

\*4. تے 7 آزاد امید واراں نے کامیابی حاصل کی تے بھارتی فضائیہ غو 92 وین یوم تاسیس اج پہلی واری چنی غے قریب تمبرم فضائیہ سٹیشن ورمانہہ منائیگنی

\*\*\*\*\*

خبران غی تفصیل نال پہلا محمد مبارک ماہر۔

### Counting

جموں کشمیر مانہہ اسمبلی انتخابات بارے ووٹاں غی گنتی جاری ہے۔ تازہ ترین نتائج غے مطابق نیشنل کانفرنس تے کانگریس اتحاد 90 رکنی جموں کشمیر قانون ساز اسمبلی مانہہ آگے ہیں۔ سگری رپورٹ غے مطابق جموں کشمیر مانہہ ہُن تک 89 نتیجان غو اعلان کیوچاچکو ہے نیشنل کانفرنس نے 41 نشست حاصل کیں جد کہ 1 مانہہ آگے ہے۔ بھارتیہ جنتا پارٹی نے 29 نشست حاصل کیں ہیں۔ کانگریس نے 6 نشستیں حاصل کی ہے اور کشمیر مانہہ پی ڈی پی نے 3 نشستیں حاصل کیں ہیں۔ جموں کشمیر مانہہ پیپلز کانفرنس نے اک نشست حاصل کی ہے۔ جموں کشمیر مانہہ سی پی آئی ایم نے عام آدمی پارٹی نے اک نشست حاصل کی ہے۔ آزاد امید واراں نے 7 نشستیں اور ور کامیابی حاصل کی ہے۔ سابق وزیر اعلیٰ تے نیشنل کانفرنس رہنما عمر عبداللہ نے بڈگام تے گا ندر بل تیں جیت درج کی ہے۔ اننت ناگ اسمبلی حلقہ تیں کانگریس غا پیرزادہ محمد سید نے کامیابی حاصل کی ہے۔ اننت ناگ مغرب تیں نیشنل کانفرنس غا عبدالمجید بھٹ نے جیت درج کی ہے۔ ہندواڑہ مانہہ جموں کشمیر پیپلز کانفرنس غا سجاد گنتی لون نے جیت حاصل کی ہے۔ کلگام مانہہ سی پی آئی ایم غا محمد یوسف تاریگامی نے جیت حاصل کی ہے۔ کانگریس غا منیا پڑمنیا رہنما غلام محمد میر نے ڈورو تیں جیت حاصل کی ہے۔ نیشنل کانفرنس غا ڈاکٹر بشیر احمد ویری اننت ناگ ضلع غا سری گفوارہ بیجہاڑہ اسمبلی حلقہ تیں پی ڈی پی سربراہ محبوبہ مفتی غی بیٹکی التجاء مفتی کولوں جتیا ہیں۔ جموں کشمیر مانہہ 90 اسمبلی حلقان واسطے ووٹ 3 مرحلاں مانہہ 18 تے 25 اور رواں مہینہ غی پہلی تاریخ نانہہ کہلیا گیا تھا۔

\*\*\*\*\*

### Major Victory

سگون پریہار نے کشتواڑ حلقہ تیں کامیابی حاصل کی ہے۔ انہاں نے نیشنل کانفرنس گا لیڈر تے سابق وزیر احمد کچلو نانہہ شکست دتی۔ جت ڈوڈہ حلقہ تیں عام آدمی پارٹی غا محراج ملک نے کامیابی حاصل کی انہاں نے سابق وزیر تے این سی غا امید وار خالد نجیت سہراوردی تے سابق وزیر تے ڈی پی اے پی غا امید وار عبدالمجید وانی نانہہ شکست دتی۔ آنجہانی کانگریس لیڈر تے ممبر پارلیمنٹ مدن لال شرما غا بیٹا ستیش شرما نے چھمب حلقہ تیں کامیابی حاصل کی۔ انہاں نے کانگریس غا سابق نائب وزیر اعلیٰ تارا چند تے بی جے پی غا سابق ایم ایل اے راجیو شرما نانہہ شکست دتی۔ ڈاکٹر رامیشور سنگھ بنی حلقہ تیں آزاد امید وار غی حیثیت تیں جتیا ہیں۔ انہاں نے بی جے پی غا سابق ایم ایل اے جیون لال نانہہ شکست دتی۔ پیارے

لال شرما اندروال حلقہ تین جیت گیا ہیں۔ انہاں نے سابق وزیر غلام محمد سروری نانہہ شکست دتی جنہاں نے آزاد امید وار غی حثیت تیں الیکشن لڑیو تھو۔ سابق ایم ایل اے چودھری محمد اکرم نے سرنکوٹ تیں آزاد امید وار غی حثیت تیں کامیابی حاصل کی۔ شبیر احمد گلے نے شوپیاں تیں آزاد امید وار غی حثیت تیں کامیابی حاصل کی ہے۔ بانہال تیں این سی غا سجاد شاہین جت گیا ہیں۔ انہاں نے سابق وزیر تے کانگریس غا سابق سربراہ وقار رسول وانی نانہہ شکست دتی۔ این سی غا سابق ایم ایل اے سریندرکمار چودھری نے بی جے پی جموں کشمیر یونٹ غا سربراہ رویندر رینہ نانہہ شکست دتی۔ این سی غا جاوید اقبال نے سابق وزیر تے بی جے پی غا امید وار چودھری ذولفقار علی نانہہ شکست دتی۔ پلوامہ تیں پی ڈی پی غا وحید الرحمن پرے نے کامیابی حاصل کی کنگن تیں این سی گامیاں محر علی نے جیت حاصل کی ہے۔

\*\*\*\*\*

## Defeat

مچ سارا منیا پڑمنیا رہنماواں بشمول دو وری گاممبر پارلیمان تے سابق وزیر چودھری لال سنگھ نانہہ بی جے پی امید وار درشن کمار نے جموں کشمیر ضلع کٹھوعہ غا بسوبلی اسمبلی حلقہ غی نشست وراں غا روایتی گڑھ تیں برابو ہے۔ چناؤ کمیشن غی ویب سائٹ غے مطابق 66 بہراں غا لال سنگھ نے 15 ہزار 8 سو 40 ووٹ لیا ہیں پر وے درشن کمار تیں 16 ہزار 34 ووٹاں غی فرق سنگ ہار گیا ہیں۔ درشن کمار شروع تیں بی اگے تھا انہاں نے 31 ہزار 8 سو 74 ووٹ حاصل کر غے جیت اپنے ناں کر لی ہے۔ ات کانگریس پارٹی غا سابق صدر وقار رسول وانی وی بانہال تیں ہار گیا۔ دو کارگذار صدر تے سابق وزیر رمن بھلا تے تارا چند با لترتیب آر ایس پورہ جموں جنوب تے چھمب حلقاں تیں چناؤ ہار گیا ہیں۔ معروف رہنما منوہر لال شرما بلا ورتیں، یوگیش سہانی جموں مشرق، مولا رام مڑھ حلقہ تیں ہار گیا ہیں۔ خطہ پیر پنجال وچوں منیا پڑمنیا رہنما تے سابق وزیر شبیر خان تھنہ منڈی تیں ہار گیا ہیں، سابق وزیر یش پال کُنڈل رام گڑھ تیں علاوہ سابق وزیر تے جموں شمال تیں نیشنل کانفرنس غا امید وار وجے سدوترا وی چناؤ ہار گیا ہیں۔ سابق وزیر ہرش دیو سنگھ چینی، نیشنل کانفرنس غا سابق وزیر سجاد کچلو کشتواڑ، سابق وزیر تے بی جے پی غا امید وار ذولفقار چودھری بدھل تے جموں کشمیر بی جے پی غا صدر رویندر رینہ وی نو شہرہ تیں چناؤ ہار گیا ہیں۔

\*\*\*\*\*

## Independent

جموں کشمیر اسمبلی انتخابات ماتہہ 7 آزاد امید واراں نے کامیابی حاصل کی ہے۔ جموں ماتہہ ستیش شرما جھیڑا کانگریس رہنما تے سابق ممبر پارلیمان مدن لال شرما غا فرزند ہیں نے چھمب اسمبلی حلقہ وچوں آزاد امید وار غی حثیت نال 6 ہزار 9 سو 29 ووٹاں غا فرق نال کامیابی حاصل کی ہے۔ انہاں نانہہ 33 ہزار 9 سو 85 ووٹ لیا۔ جد کہ بھارتیہ جنتا پارٹی غا امید وار راجیو شرما 27 ہزار 56 ووٹ حاصل کرن ماتہہ کامیاب رہیا۔ سابق نائب وزیر اعلیٰ تے کانگریس غا کاگزار صدر تارا چند ہور تیجا نمبر ور رہیا اور انہاں نانہہ صرف 16 ہزار 4 سو 49 ووٹ لیا ہیں۔ ات اندروال اسمبلی حلقہ ماتہہ آزاد امید وار پیارے لال شرما نے تجربہ کار تے سابق وزیر غلام محمد سروری نانہہ 6 سو 43 ووٹاں غا فرق تیں برابو۔ شرما نے 14 ہزار 1 سو 95 ووٹ حاصل کیا جد کہ سروری جھیڑا آزاد امید وار غے طور ور مقابلو کر رہیا تھا ان نے 13 ہزار 5 سو 52 ووٹ حاصل کیا ہیں۔ بنی ماتہہ آزاد امید وار ڈاکٹر رامیشور سنگھ نے بی جے پی امید وار تے سابق ایم ایل اے جیون لال نانہہ 2 ہزار 48 ووٹاں تیں برابو ہے۔ رامیشور سنگھ نے 18 ہزار 6 سو 72 ووٹ حاصل کیا ہیں۔ ات ضلع پونچھ غا سرنکوٹ اسمبلی حلقہ ماتہہ آزاد امید وار تے نیشنل کانفرنس غا معزز رہنما چودھری محمد اکرم نے کانگریس امید وار شاہنواز نانہہ 8 ہزار 8

سو 51 ووٹاں گا فرق نال ہرایو ہے۔ چودھری اکرم نے 34 ہزار 2 سو 1 ووٹ حاصل کیا ہیں۔ تہنہ منڈی راجوری تیں ریٹائرڈ جج مظفر اقبال خان کامیاب ہوا ہیں۔ انہاں نے 32 ہزار 6 سو 45 ووٹ حاصل کیا ہیں۔ وادی کشمیر غا ضلع باہمولہ غا رکن پارلیمان انجینئر رشید غا بھائی خورشید احمد نے لنگیٹ تیں جد کہ شبیر احمد نے شوپیاں حلقہ تیں جت درج کی ہے۔

\*\*\*\*\*

## BJP REAX

بی جے پی غا جنرل سیکریٹری ارون سنگھ نے یقین ظاہر کیو ہے کہ بی جے پی ہریانہ مانہہ تیجی واری حکومت بناوے گی۔ کیونجے انتخابی نتیجاں غا رجحان اس غا حق مانہہ آریا ہیں۔ نوی دہلی مانہہ نامہ نگاراں سنگ گل کرتاں واں مذکورہ سیکریٹری نے کہیو کہ اس سنگ ظاہر وے کہ لوکاں نے بی جے پی غی طرفوں ریاست مانہہ کیا گیا ترقیاتی کماں وراعتما د ظاہر کیو ہے۔

\*\*\*\*\*

## PM Navratri

وزیر اعظم نریندر مو دی نے نوراتری غا چھپواں تہاڑا غا موقعہ ورا دیوی کاتیانی غی پوجا کی ہے۔ اک سوشل میڈیا پوسٹ مانہہ وزیر اعظم نے لکھیو کہ دیوی کاتیانی غی دُعا غی برکت ان غا تمام عقیدت منداں غی زندگی نانہہ قوت، طاقت تے ہمت نال پہرے۔

\*\*\*\*\*

یہ خبر تم آکاشوانی جموں تیں سن رہیا ہیں خبراں غا باقی حصہ نال نصرت چودھری۔

## IAF day

بھارتی فضائیہ غو 92 واں یوم تاسیس اج پہلی وار چنی غا تمیرم ہوائی اڈہ ورا منایو گیو۔ اس موقع ورا بھارتی فوج غا سربراہ جنرل انیل چوپان نے جھنڈو لہرایو۔ فضائیہ غا سربراہ اے پی سنگھ نے سلامی دستاں غو معائنو کیو اور بہرے فضائیہ غی یونٹاں غی ممتاز کارکردگی ورا تعریفی سنداں تے اعزازت سنگ نوازیو۔ سلامی دستاں سنگ خطاب کرتاں واں بھارتی فضائیہ غا سربراہ نے کہیو کہ عالمی سلامتی کی ضرورت اور جاری تنازعاں نانہہ دیکھتاں واں اک مضبوط تے قابل فضائیہ غی لوڑ غو اظہار کیو۔ اُن نے کہیو جے بھارتی فضائیہ نانہہ ہمیشہ مُک غا قومی مفاد نانہہ للکارن آلی کسے وی ہنگامی صورتحال سنگ نمڑن واسطے ہر گھڑی تیار رہن غی لوڑ ہے۔ اُن نے کہیو کہ نوی ٹیکنالوجی غے نال نال جدید تے اس تیں آگے بدھ غے سوچ نانہہ اپناو اج غا ماحول غی لوڑ مانہہ فیصلہ کن کردار ادا کرے گو۔ اس بہرے ہوائی فوج غا تاسیسی تہاڑا غو موضوع ”بھارتیہ وایو سینا سکشم ساشکت تے آتم نربہر“ نانہہ نوٹ کرتاں واں کہیو کہ اس مانہہ فضائیہ غی وے خواہشات بالکل واضع طور ورا بیان کی گئی ہیں۔ جہیڑی کئی بہراں تیں بدھتی رہی اور بہتر ٹیکنالوجی غے نال زیادہ با اختیار ہو غے اعلیٰ کارکردگی غو درجو حاصل کر چکی ہے۔

\*\*\*\*\*

## Vayu Veer Vajjeta Rally

شاہراں گا وزیر مملکت بریش ملہو ترہ نے بھارتی فضائیہ غا تہاڑا گا موقعہ ورا لداخ غا تھو نیس تیں شروع ہون آلی ”وایو ویر وجیتا“ کاریلی غو آغاز کیو۔ جہیڑی 7 ہزار کلو میٹر غو فاصلو طے کرے گی۔ ریلی مانہہ فضائیہ غا سپاہی تے آٹراکھنڈ میموریل گا سابق فوجی شامل ہیں۔ آئی اے ایف ایڈوینچر سیل غا وینگ کمانڈر وجے پرکاش بھٹ ریلی غی قیادت کر رہیا ہیں۔ یوہ رستو کرگل، سرینگر، جموں، دہرا دون تیں ہوتاں واں اس مہینہ غی 29 تاریخ نانہہ آندھرا

پر دیش مانہہ ختم وے گی ۔ ریلی غومقصد لوکان نانہہ بھارتی فضانیہ غی عظیم تاریخ جنگ تے  
بچاؤ مشیناں مانہہ اُن غا سپاہیاں غی بہادری غا بارہ مانہہ آگاہ کرنو تے نوجواناں نانہہ اپنا مُلک  
غی خدمت کرن غی ترغیب دینو ہے۔

\*\*\*\*\*